

CONFINACHE

Confinemint, confiné, confinache ... quo qu' cha veut dire ? Dins l' temps, quéqu'un qui restot confiné à s' baraque, chétot quéqu'un qui étot malade, ou qui pouvot pus marcher. « Allez viens faire un tour avec nous, té vas pas rester là comme cha confiné tout l'après-midi ?! ... » qu'alle m' dijot m' mère quand alle véyot qu' j'allos pas fort bien. Pis ché tout, ch' mot là in s'in servot pas souvint.

Eune fos, y' a longtims, quand qu' j'étois jeaunne, j'ai dû rester « confiné » comme cha à m' baraque, qu' j'avos attrapé l' varicelle. In m' rassaquant au matin pou aller à l'école, quand qué j' sus arrivé dins l' cuisine pour avaler min banania, m' mère alle m'a ravisé d'un drôle d'air ; alle s'a rapproché d' mi, ravisé dins min cou, sur min front, pis alle m'a dit d'artirer m' veste éd pyjama ; mi j' comprénos pas trop chu qui s' passot, surtout quand alle s'a arculé d'un seul coup in mettant s' main devant s' bouque, avec des ziux horriifiés : « Mon Diu ! i' est plein d' boutons ! » alors j'ai ravisé min vinte et j'étois arcouvert éd' points rouches ! J'avos la varicelle. I paraît qu' chétot contagieux, qu' j'allos l' faire attrapper à tout l' monde , alors alle a appelé ch' docteur et jé m' sus artrouvé « confiné » dins l' pièche à mémère, qu'elle alle l'avot eue étant jeaunne et qu'à s' n' âche, alle risquot pus grand cosse. J' restos infermé là tout l' journée, j' lijos des panpans, in m'apportot à minger, j'avos pus l' drot d' sortir, minme mes camarates qui vénotent buquer à l'porte pour aller juer au ballon dins l' rue i zavotent pus l' drot dé m' vire ! In plus cha grattot et i m' surveillotent pou pas qu' jé m' gratte, que sinan j'allos n'avoir tout partout et qu' cha guérirot pus !... Cha a duré eune paire éd' jours, chés boutons i sont partis et j'ai pu arvenir minger dins l' cuisine avec tous zautes et après cha artourner à l'école. Mais jé m' rappelle pas qué l' monde i s'étoit arrêté d' tourner pour autant ! Ni qu'in n'avot parlé dins La Voix du Nord...

Alors qu'aujourd'hui in n'intind pus qu' cha ! à croire qué ch' mot là y'a rimplaché tous zautes ! Confiné, restez confiné ! surtout mettez pas vous nez dehors ! Pourquoi, i fait si frod qu' cha ? Bin nan, j' ravisse par ch' carreau et dehors i fait grand solelle ; j' ouve él ferniette et j'intinds chés moniaux qui piulent à qui miux miux ; par conte j'intinds pos d' carette ; y' aurot pus d'essence ? Ché pour cha qu'in n'aurot pus l' drot d' sortir ?...

Ou bien i n'a un qui a fait eune grosse grosse bétisse qu' tout l' monde i est puni ? Cha dot ête eune grosse, pis eune fameusse minme ! In tout cas ché pas mi, j'ai rien fait, j'étois dins min gardin à planter mes pétotes !

L'aute jour, j'ai sorti un oeulle pour vire, pis les deux ; personne ; du coup j'ai pris m' carette pour aller m'acater à minger ; personne non pus su chés routes ! Pus un tchien non pus ! Cha s' rot David Vincent qu' finalemint i' avot raison, qu' chés zinvahisseurs i s'rotent arrivés ? Ou bien qui n'a un, à forche éd' faire sin malin, qu' i aurot appoyé su' ch' bouton rouche sans l' faire esprès ?

Dins ch' magasin, tout l'monde, enfin chés trois quate gins qui trainotent là, i zavotent un masque, in marchant su l' pointe des pieds, faijant des détours pou pas m'croiser et m' ravisant minme éd' coin !... Bin chétot pas dé m' faute si j' m'étois pas déguisé, jé l' savos pas qui zavotent cangé l' date éd' mardi gras ! à l' caisse parelle, j' dos rester à deux mètes dé l' caissière, déguisée elle aussi, mais sans capiau pointu ! Pis pas d' musique, pas d' guirlandes, pas d' cotillons ... Un drôle éd' mardi gras ...

J' sors avec min sac à commission, personne su ch' parking ; du coup j' comminche à prinde peur et jé m' dépêche éd' rentrer à m' baraque. Cha va, j'ai réussi à acater deux trois

bricoles à minger, chés zinvahisseurs i zavotent pas cor tout pris. In tout cas jé n'ai pas vu mais cha m'arvient, jé m' rappelle dins ch' générique, i prénotent forme humaine et in avot du mau à z' arconnaîte ... Ah, si, à leur pétit dogt qui étot artourné ; merde ! j'y ai pas pinsé dins ch' magasin, j'auros dû raviser ; surtout l' caissière qui avot un drôle d'air ...

Ou bien ché eune nouvelle mode ! Mais cha, la mode, ché dur à comprinde ... Si ché cha, in n'est pas sorti d' l'auberche ...

Bon bin in attendant, j' vas rester à m' baraque ; quand j'allume éch' poste ou l' télé, j'intinds qu' cha « confinemint », « restez confinés », « la fin du confinache n'est pas pour demain matin ».... Bin alors, quo qu'i s' passe ? Mi j' comprends rien ; à l' télé au soir in vot des étapes du tour de France d' l'an 2000 ou des Paris Roubaix dés z'années passées. Et c' soir, in aura drot in direct à France Belgique, l' demi finale dé l' coupe du monde 2018 ! L' monde i est dév' nu sot ? In s'a trompé dins les couloirs du temps ? Ch' bon Diu i' a fait quère sin calendrier qu' tous chés feuilles alles sont mélangées ? ...

Apparemmint, dins m' baraque, tout va bien, rien n'a cangé, tout i'est à s' plache et personne i vient m'imbêter pou l' momint; alors j' vas rester là et pus sortir ; ché pus prudint.

Ché pour min tchien qu' cha m'imbête ; pour li, confiné, cha n' veut rien dire ; ché pas un mot qui connot, et cor moins qu'i comprind ! I comprind rien à chu qui s' passe d'abord ; i reste là rétalé dins ch' canapé, à dormir tout l' journée avec ses ziux ouverts, à m' raviser aller et vénir, passer et arpasser. « Bin quo qu'i s' passe ? » qu'i dot s' dire ; « in sort pus ? » « J'ai fait quéque cosse éd mau ? J' sus puni ? Pourtant j'ai rien fait, in tous cas jé m' rappelle pas ... ». Bin nan, t'as rien fait min tchien, et pourtant té puni quand minme ! et cha ché difficile à li' espliquer ; surtout ch' mot pangolin qui comprind pas, qui n'est pas dins s' liste éd mots qu'i connot . Commint i espliquer qu'in n'a pus l' drot d' sortir à cause d'un agozile là bos au fin fond d' la Chine qui a décidé d' minger eune tranche éd pangolin ! ... Minger du pangolin ! surtout qu'li i minche que délle pâtée in boîte et des croquettes !

Nan, j'ai arnonché à li espliquer ; alors in reste là tout l' journée, comme cha, à s' raviser ...